



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Baukau
Outubru 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 24

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	10
Artigu 145 KP & artigu 2, 3, no 35 letra (b) LKVD no Artigu 258 KP	Ofensa ba integridade fízika simples ho natureza VD no danu simples	1
Artigu 145 KP & artigu 2, 3, no 35 letra (b) LKVD no Artigu 20 (1), artigu 2 (2 alinea f) Lei Arma Brankas	Ofensa ba integridade fízika simples ho natureza VD no arma brankas	2
Artigu 154 KP & artigu 2, 3, no 35 letra (a) LKVD	Maus-tratus ba kónjuje	1

Artigu 177 KP & artigu 182 (1)	Abuzu seksuál ba menór ho agravasaun	2
Artigu 146 (e) KP	Ofensa ba integridade física grave	1
Artigu 20 (1,2 alinea f) no artigu 19 (1) lei arma brankas	Arma brankas no rama ambon	1
artigu 20 (1) Lei Arma Brankas	Arma brankas	1
Artigu 140 KP	Omisídiu negligente	1
Artigu 252 KP	Furtu agravadu	1
Artigu 253 KP	Roubu	1
Artigu 261 (1)	Uzurpasaun ba imovel	1
Artigu 260 KP, artigu 185 (3) KP ho Artigu 20 (1), artigu 2 (2 alinea f) Lei Arma Brankas	Danu ho violénsia, violasaun domisiliar no arma brankas	1
Totál		24

2. Totál desizaun ne'ebé JSMP monitoriza: 18

Tipu desizaun	Artigu	Númeru
Pena prizaun	Artigu 66 KP	1
Suspensaun ba prizaun nia ezelesaun	Artigu 68 KP	8
Pena multa	Artigu 67 KP	5
Suspensaun ba prizaun nia ezelesaun no omologa	Artigu 68 KP no artigu 216 KPP	1
Pena prizaun, suspensaun ba prizaun nia ezelesaun no absolve	Artigu 66 KP no artigu 68 KP	1
Absolve		2
Totál		18

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 6

B. Deskrisaun sumáriu julgamentu ba desizaun kazu sira

1. Krime uzupasaun imovel

Nú. Prosesu : 0007/21. LALPL
Kompozisaun Tribunál : Singulár
Juis : Dr. José António d. Escurial
Prokuradór : Dr. Ambrosio Rangel Freitas
Defeza : Dr. Grigório Maria Lourdes de Lima
Desizaun : Absolve

Iha 04 Outubru 2022, Tribunál Distritál Baukau prezide julgamentu leitura sentensa ba krime uzupasaun imovel ne'ebé envolve arguidu Arsenio da Costa no arguidu Almeiro Joaquim Cabral hasoru lezadu Rogeiro da costa, iha Suku Soru, Postu Administrativu Lospalos, Munisípiu Lautem.

Akuzasaun Prokuradór

Prokuradór akuza katak iha 06 Janeiru 2021, iha oras tuku 14:00 lokraik, bainhira lezadu atu ba haree nia kintal arguidu sira uza forsa, tau haleu lezadu nia kintal ho besi kuadradu (*kotak*) no arame paru-paru.

Prokuradór akuza arguidu sira kontra artigu 261 (1) KP kona-ba uzurpasaun ba imovel ho moldura penál tinan 1 too tinan 4.

Produsaun ba prova sira

Iha prosesu julgamentu, arguidu Arsenio da costa deklara katak sira halo lutu uza besi kuadradu (*kotak*) no arame paru-paru haleu laos ba lezadu nia rai, maibé sira nia rai no ai-horis ne'ebé moris iha kintal nia laran ne'e, lezadu nia rian ema Indonézia mak kuda, arguidu deklara mós katak problema ne'e antes ne'e rezolve ona tuir família no arguidu indemniza ona ai-horis iha kintal laran ho valor osan US\$2,500.00 ba lezadu. Arguidu deklara liután katak foin primeiravés mai hatan iha tribunál, di'ak malu ona ho lezadu, serbisu nu'udar diretór kompania ho rendementu kada fulan US\$3,000.00.

Arguidu Almeiro Joaquim Cabral deklara katak momento ne'e sira mak ba halo lutu uza besi kuadradu (*kotak*) no arame paru-paru haleu rai refere, kona-ba ai-horis arguidu Arsenio da Costa fó ona osan US\$2,500.00. Arguidu mós deklara katak foin primeiravés mai hatan iha tribunál, di'ak malu ona ho lezadu serbisu nu'udar siguransa iha Embaixada America ho vensimetu kada fulan US\$605.00.

Entretantu lezadu deklara katak, bainhira lezadu fila husi Mehara haree lezadu haree lutu haleu ona lezadu nia kintal, ho nune'e lezadu sobu tiha. Lezadu mós deklara katak antes ne'e mak arguidu sira informa ba lezadu karik lezadu sei la sobu lutu refere, tanba lezadu rekuñese rai ne'e arguidu sira nia nian, lezadu mós simu ona osan US\$2,500.00 husi arguidu sira.

Alegasaun finál

Prokuradór haktuir katak bazeia ba produsaun ba prova arguidu sira halo lutu la informa ba lezadu, lezadu rekuñese rai ne'e arguidu sira nian no ai-horis sira ne'ebé iha kintal

laran rezolve ona tuir kultura. Tanba ne'e husu ba tribunál atu absolve arguidu sira husi prosesu ne'e.

Alende ne'e, defeza mós konkorda ho alegasaun prokuradór nian atu absolve arguidu sira husi prosesu ne'e.

Desizaun

Depoisde avalia faktu hotu, tribunál prova katak arguidu sira halo lutu la informa ba lezadu, lezadu rekuñese rai ne'e arguidu sira nian no ai-horis sira ne'ebé iha kintal laran rezolve ona tuir kultura.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu sira foin primeiravés mai hatan iha tribunál, kazu ne'e sira rezolve ona tuir kultura no lezadu mós rekuñe katak rai ne'e arguidu sira nian, nune'e tribunál konklui prosesu ne'e no absolve arguidu sira husi prosesu ne'e.

2. Krime ofensa ba integridade fízika simples ho natureza violénsia doméstika

Nú.Prosesu : 0007/21. VQWTL
Kompozisaun Tribunál : Singulár
Juis : Dr. José António d. Escurial
Prokuradór : Dr. Ambrosio Rangel Freitas
Defeza : Dr. Grigório Maria Lourdes de Lima
Desizaun : Pena prizaun tinan 1 suspende ba tinan 1

Iha 04 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 03 Feveireiru 2021, iha oras tuku 09:00 dadeer, arguidu basa dala ida iha lezada nia kakorok, lori ai-pedasuk baku dala ida iha lezada nia ulun, tebe dala ida iha lezada nia kotuk laran no basa dala ida iha lezada niaibun. Antes agresaun ne'e. arguidu ho lezada diskute malu kona-ba arguidu haruka lezada atu foti tua sabu jerigen rua fó arguidu nia kolega no lezada dehan katak la kuñese, ho nune'e mosu agresaun hirak ne'e. Antes ne'e iha tinan 2019, arguidu tebe dala ida iha lezada nia ain parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu mós deklarata katak iha tinan 2018, arguidu mai ona tribunál komete krime hanesan hasoru lezada no arguidu konsege detein iha sela Polísai. Arguidu mós deklarata katak diak malu ho lezada

no to'o agora arguidu la baku ona lezada no arguidu nu'udar agrikultor rezultadu sustenta de'it ba família.

Alende ne'e, lezada kontinua konfirma faktu hotu iha akuzasaun no deklar katak akontese iha tinan 2019, lezada la hato'o keixa tanba lezada grvida hela fulan lima. Iha tinan 2018 sira mai julgamentu ona dala ida kona ba arguidu baku lezada no arguidu hetan kondensasaun pena prizaun fulan haat suspende ba tinan rua. Lezada mós deklar katak depoisde akontesementu ne'e diak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós husi lezada, arguidu la konsidera lezada nu'udar nia feen, arguidu la hatudu nia arrendementu tanba ne'e husu ba tribunál atu kondena arguidu ho pena prizaun fulan neen, nune'e evita arguidu repete hikas ninia hahalok ne'e iha futuro no eduka mós comunidade sira.

Entretantu, defeza husu ba tribunál atu kondena arguidu ho pena suspensaun ho konsiderasaun katak arguidu konfesa, arrepende ninia hahalok, diak malu ona ho lezada no arguidu mak responsavel ba nia família.

Desizaun

Depoisde avalia faktu hotu, tribunál prova katak arguidu basa dala ida iha lezada nia kakorok, lori ai-pedasuk baku dala ida iha lezada nia ulun, tebe dala ida iha lezada nia kotuk laran no basa dala ida iha lezada nia ibun no antes ne'e iha tinan 2019 arguidu tebe dala ida iha lezada ain parte loos.

Bazeia ba faktu provadu sira ne' e hotu no tetu mós ho sirkunstánsia atenuante sira hanesan, arguidu konfesa, diak malu ona ho lezada, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

3. Krime arma brankas no rama ambon

Nú.Prosesu	: 0008/20. BCBQI
Kompozisaun Tribunál	: Koletivu
Juis	: Dra. Sribuana da Costa, Dra. Maria Modesta d. A. Viera no Dr. José António d. Escurial
Prokuradór	: Dr. Bartolomeu de Araújo
Defeza	: Dr. Grigório Maria Lourdes de Lima
Desizaun	: Pena prizaun tinan 3 suspende ba tinan 3 ba arguidu Apolinario Mascarinhas, pena prizaun tinan 4 ba arguidu Julio Guterres Fraga, arguidu Simão de Lima Guterres no absolve arguidu Felix de Carvalho Guterres, Edmundo Guterres, Juvinal Caetano Guterres no Ricardo Fabião Guterres.

Iha 06 Outubru 2022, Tribunál Distritál Baukau prezide julgamentu leitura akordaun ba krime arma brankas no rama ambon ne'ebé envolve arguidu Apolinario Mascarinhas, Felix de Carvalho Guterres, Edmundo Guterres, Julio Guterres Fraga, Simão de Lima Guterres, Juvinal Caetano Guterres no Ricardo Fabião Guterres hasoru Estadu RDTL, iha Suku Lavateri, Postu Administrativu Baguia, Munisípiu Baukau.

Akuzasaun Prokuradór

Prokuradór akuza katak iha 04 Juñu 2020, iha oras tuku 11:00 meiodia, iha bazar Lavateri arguidu Apolinario ho nia grupu halo asaun provokasaun iha bazar laran, kauza ema sira iha bazar sente tauk tanba arguidu sira uza sasan kroat hanesan rama ambon no katana. Arguidu sira foin hapara sira ninia asaun ne'e, bainhira ekipa konjuta ne'ebé kompostu husi PNTL no F-FDTL mosu mai arguidu sira halai namkari, mezmu nune'e ekipa konjuta consege kaer arguidu sira.

Prokuradór akuza arguidu sira kontra artigu 20 (1, 2 alinea f) kona-ba arma brankas no artigu 19 (1) kona-ba rama ambon.

Produsaun ba prova sira

Iha prosesu julgamentu, arguidu Apolinario Mascarinhas deklara katak momentu ne'e arguidu ba bazar kaer ho katana, tanba antes ne'e entre suku Lavateri no Suku Atelari iha ona problema, nune'e arguidu lori ho katana atu defende-an. Bainhira fila la'o hamutuk ho kolega sira derepente Polisia no F-FDTL toman sira iha dalan hodi kaer sira.

Arguidu Felix de Carvalho deklara katak arguidu ba bazar la'o mesak no la kaer kroat ruma iha liman, arguidu fila husi bazar mak la'o hamutuk ho kolega sira derepente Polisia no F-FDTL toman sira iha dalan no kaer sira.

Arguidu Edmundo Guterres deklara katak arguidu ba bazar la'o mesak no la kaer kroat ruma iha liman, arguidu fila husi bazar mak la'o hamutuk ho kolega sira derepente Polisia no F-FDTL toman sira iha dalan no kaer sira.

Arguidu Julio Guterres Fraga deklara katak momentu ba bazar kaer ho rama ambon, tanba antes ne'e entre Suku Lavateri no Suku Atelari iha ona problema, nune'e arguidu lori ho rama ambon atu defende-an bainhira fila la'o hamutuk ho kolega sira derepente Polisia no F-FDTL toman sira iha dalan no kaer sira.

Arguidu Simão de Lima Guterres, deklara katak momentu ba bazar kaer rama ambon, tanba antes ne'e entre Suku Lavateri no Suku Atelari iha ona problema, nuune'e arguidu lori ho rama ambon atu defende-an. Bainhira fila la'o hamutuk ho kolega sira derepente Polisia no F-FDTL toman sira iha dalan no kaer sira.

Arguidu Juvinal Caetano Guterres, deklara katak arguidu ba bazar la'o mesak no la kaer kroat ruma iha liman, arguidu fila husi bazar mak la'o hamutuk ho kolega sira derepente Polisia no F-FDTL toman sira iha dalan no kaer sira.

Arguidu Ricardo Fabião Guterres, deklara katak momentu ne'e ba bazar kaer ho fizga ho besi beton badak hamutuk sanulu resin rua, tanba antes ne'e entre Suku Lavateri no Suku Atelari iha ona problema, nune'e arguidu lori ho fizga atu defende-an. Bainhira fila la'o hamutuk ho kolega sira derepente Polisia no F-FDTL toman sira iha dalan no kaer sira.

Testemuña Constantino Mendonca Ximenes, nu'udar membru F-FDTL depoimentu katak antes ne'e iha ona problema entre populasaun Suku Atelari no Suku Lavateri, ho nune'e ekipa konjuta ne'ebé kompostu husi PNTL no F-FDTL halo operasaun no momentu ne'e iha lora Kinta tempu bazar, testemuña ho nia maluk sira simu informasaun katak grupu balun lori sasan kroat mai iha bazar nune'e testemuña ho maluk sira ba iha bazar derepente arguidu ho nia maluk sira halai namkari no konsege kaer arguidu nain hitu no arguidu nain hitu kopera no kontinua lori ba iha Eskuadra Polisia Baguia.

Alegasaun finál

Prokuradór konsidera arguidu Simão de Lima, Julio Guterres Fraga no Apolinario Mascarinhas provadu komete krime ne'ebé akuza ba sira, nune'e husu ba tribunál atu kondena arguidu sira ho pena prizaun tinan haat no ba arguidu Apolinariu deklara uza katana ba bazar ho intensaun mezmua la halo kanek ema ruma tanba ne'e husu ba tribunál atu kondena arguidu Apolinariu ba pena prizaun tinan tolu suspende ba tinan tolu. Enkuantu ba arguidu Felix de Carvalho Guterres, Edmundo Guterres, Juvinal Caetano Guterres no Ricardo Fabião Guterres la provadu komete krime ne'ebé akuza ba sira, nune'e husu ba tribunál atu absolve arguidu sira husi prosesu ne'e.

Alende ne'e, defeza mós konkorda ho alegasaun prokuradór nian atu kondena arguidu Simão de Lima, Julio Guterres Fraga no Apolinario Mascarinhas provadu komete krime ne'ebé akuza ba sira, nune'e husu ba tribunál atu kondena arguidu sira ho pena prizaun tinan haat no ba arguidu Apolinariu deklara uza katana ba bazar ho intensaun mezmua la halo kanek ema ruma tanba ne'e husu ba tribunál atu kondena arguidu Apolinariu ba pena prizaun tinan tolu suspende ba tinan tolu. Enkuantu ba arguidu Felix de Carvalho Guterres, Edmundo Guterres, Juvinal Caetano Guterres no Ricardo Fabião Guterres la provadu komete krime ne'ebé akuza ba sira, nune'e husu ba tribunál atu absolve arguidu sira husi prosesu ne'e.

Desizaun

Depoizde avalia faktu hotu, tribunál prova katak bazeia ba produsaun prova arguidu Apolinario Mascarinhas kaer katana, arguidu Julio Guterres Fraga kaer rama ambon ho oan hamutuk haat, arguidu Simão de Lima Guterres kaer rama ambon ho oan hamutuk haat. Arguidu Felix de Carvalho Guterres, Edmundo Guterres, Juvinal Caetano Guterres no Ricardo Fabião Guterres sira la uza no la kaer arma ruma iha sira nia liman.

Bazeia ba faktu provadu sira ne'e, nune'e tribunál konklui prosesu ne'e no kondena arguidu Apolinario Mascarinhas ho pena prizaun tinan tolu suspende ba tinan tolu, kondena arguidu Julio Guterres Fraga no arguidu Simão de Lima Guterres ho pena

prizaun tinan haat. Enkuantu ba arguidu Felix de Carvalho Guterres, Edmundo Guterres, Juvinal Caetano Guterres no Ricardo Fabião Guterres tribunál absolve husi prosesu ne'e.

4. Krime ofensa ba integridade fízika simples ho natureza violénsia doméstika

Nú. Prosesu : 0005/21.LASIC
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Sidonio Maria Sarmento
Desizaun : Pena prizaun fulan 6 suspende ba tinan 1 fulan 6

Iha 07 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne' ebé envolve arguidu JdS hasoru nia feen, iha Munisípiu Lautem.

Akuzasaun Prokuradór

Prokuradór akuza katak, iha loron no fulan ne' ebé la apuradu maibé iha tinan 2019, arguidu tuku dala barak iha lezada nia tilun-hun. Kazu ne'e akontese tanba arguidu deskonfia lezada ba mane seluk.

Tuir mai iha 04 Novembru 2021, iha oras tuku 23:00 kalan, arguidu tuku dala tolu iha lezada niaibun, tuku dala tolu iha lezada nia kanuruk, buti dala ida iha lezada nia kakorok no kaer lezada nia fuuk hodi riba rai. Antes agresaun ne' e, arguidu ho lezada diskute malu kona-ba arguidu nia feen primeiru nia oan mane halo lakon tiha lezada nia memori kard, ho nune' e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to' o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak arguidu la halo agresaun hanesan akuzasaun prokuradór nian, arguidu so dada de'it lezada nia fuuk no lezada niaibun kona iha fatuk mak kanek, laos arguidu mak tuku lezada niaibun.

Iha parte seluk, lezada konfirma faktu hotu iha akuzasaun no deklara katak depoisde akontesimentu ne'e sira diak malu kedas no to' o agora arguidu la komete tan krime seluk hasoru lezada.

Alegasaun finál

Prokuradór konsidera arguidu provadu komete krime hasoru lezada, mezmuiha produsaun ba prova arguidu koko atu nega faktu sira iha akuzasaun, maibé lezada konfirma, nune' e atu prevene arguidu repete tan ninia hahalok ne' e iha futuru, husu ba tribunál atu kondena arguidu ba pena prizaun tinan ida suspende ba tinan rua.

Entretantu defeza haktuir katak arguidu deklara deit faktu ne'ebé nia komete, diak malu ona ho lezada no depoisde akontesementu ne'e la komete tan krime seluk hasoru lezada. Tanba ne'e husu ba tribunál aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak tinan 2019 arguidu tuku dala barak iha lezada nia tilun-hun. Tuir mai iha 04 Novembru 2021, arguidu tuku dala tolu iha lezada niaibun, tuku dala tolu iha kanuruk buti dala ida iha lezada nia kakorok no kaer lezada nia fuuk hodi riba ba rai.

Bazeia ba faktu provadu sira ne' e no tetu mós ho sirkunstánsia atenuante sira hanesan, arguidu ho lezada diak malu ona no depoisde akontesementu ne'e arguidu la komete tan krime seluk hasoru lezada. Ho nune' e tribunál konklui prosesu ne'e no kondena arguidu ho pena prizaun tinan ida suspende ba fulan neen.

5. Krime maus-tratus ba kónjuje

Nú. Prosesu : 0007/21. BCLLB
Kompozisaun Tribunál : Singulár
Juis : Dra. Maria Modesta d. A. Viera, Dra.Sribuana da Costa no
Dr. José António d. Escurial
Prokuradór : Dr. Ambrosio Rangel Freitas
Defeza : Dr. Sidonio Maria Sarmiento
Desizaun : Pena prizaun tinan 2 suspende ba tinan 2

Iha 07 Outubru 2022, Tribunál Distritál Baukau prezide julgamentu leitura akordaun ba krime maus-tratus ba kónjuje ne' ebé envolve arguidu OJB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha data no fulan ne'ebé la apuradu, maibé entre tinan 2019 no 2020 arguidu basa dala ida iha lezada nia hasan no tuku dala haat iha lezada nia kotuk laran. Antes agresau ne'e, arguidu ho lezada diskute malu kona-ba arguidu horon lezada iis sigaru de'it no iha momentu ne'e lezada la hato'o keixa.

Tuir mai iha 07 Dezembru 2021, iha oras tuku 10:00 dadeer, arguidu tuku dala ida iha lezada nia kabaas parte karuk no basa dala ida iha lezada nia hasan parte karuk, lezada ba hato'o keixa iha Polísia no halo tratamentu iha Sentru Saúde Ostiko.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál to'o tinan 3 ka multa, konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak komete aktu ne'e hasoru lezada, tanba lezada fuma nune'e arguidu dehan ba lezada antes kous labarik presija haris tiha lai, maibé lezada lakohi no husu tan sigaru ba arguidu atu fuma no lezada mós joga Pes, ho nune'e arguidu halo agresau hasoru lezada.

Arguidu deklara liután katak diak malu ona ho lezada, arrepende ona nia hahalok, foin primeiravés mai hatan iha tribunál, arguidu nu'udar estudante universitariu UNTL, agora moris hamutuk nafatin nu'udar feen ho la'en no la baku ona lezada.

Alende ne'e, lezada konfirma faktu hotu iha akuzasaun no konfirma mós ho arguidu nia deklarasaun katak lezada fuma no joga Pes. Lezada deklara liután katak lezada fuma sigaru dezde sei kiik, lezada joga karta Pes ho osan hodi anima-an, osan ne'ebé lezada uza ba joga karta ne'e lezada nia inan aman mak fó. Di'ak malu ona to'o agora arguidu la baku ona lezada.

Alegasaun finál

Prokuradór haktuir katak arguidu nia aktu ne'e priense duni krime maus-tratus ba kónjuje, bazeia ba konfisaun arguidu nian no konfirma mós husi lezada. Tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak, arguidu konfesa faktu hotu iha akuzasaun, arrepende ona nia hahalok, foin primeiravés mai hatan iha tribunál, moris hamutuk nafatin hanesan feen ho laen. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak tinan 2019 no 2020, arguidu basa lezada nia hasan no tuku dala haat iha lezada isin no iha 07 Dezembru 2021, iha oras tuku 10:00 dadeer, arguidu tuku dala ida iha lezada nia kabaas parte karuk no basa dala ida iha lezada nia hasan parte karuk.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu arrepende ona nia hahalok, diak malu ona ho lezada, foin primeiravés mai hatan iha tribunál no moris hamutuk nafatin hanesan feen ho laen, nune' e tribunál konklui prosesu ne'e kondena arguidu ho pena prizaun tinan rua suspende ba tinan rua.

6. Krime arma brankas

Nú. Prosesu	: 0036/21. PDBAU
Kompozisaun Tribunál	: Koletivu
Juis	: Dra. Maria Modesta d. A. Viera, Dr. José Celestino no Dra. Sribuana da Costa.
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena prizaun tinan 3 suspende ba tinan 3

Iha 07 Outubru 2022, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Tome Freitas Belo hasoru Estadu RDTL, iha Suku Buibau, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 06 Setembru 2017, iha oras tuku 06:30 dadeer, mosu diskusaun entre arguidu ho testemuña kona-ba arguidu husik nia feen ne'ebé grávida hela fulan tolu, nune'e arguidu taa lezadu niaibun kulit no rezulta lezadu nia nehan rua monu. Hafoin arguidu halai tiha no testemuña kontinua ba halo tratamentu iha Ospital Baukau.

Prokuradór akuza arguidu kontra artigu 20 (1), artigu 2 (2 alinea f) kona-ba Lei Arma Brankas ho moldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak momentu fila husi knua to'o uma no hadia hela kareta derepente testemuña ba diskute malu ho arguidu depois testemuña fila ba uma, mai fali ho katana duni arguidu, nune'e arguidu halai ba subar tiha iha arguidu nia tiu nia uma laran no tama liu ba iha Elizario nia kuartu laran, arguidu haree testemuña kaer katana ho lampra tama liu ba uma laran, nune'e mak arguidu foti Elizario nia katana hodi taa kona testemuña niaibun rezulta kanek.

Testemuña Jose Lobato Ximenes nu'udar arguidu nia maun depoimentu katak momentu mosu diskusaun kona-ba arguidu husik nia feen, nune'e testemuña hirus lori katana duni arguidu halai tama ba nia tiu nia uma laran testemuña halai tuir derepente arguidu uza katana ta testemuña niaibun. Kazu akontese iha tina 2017, testemuña la hato'o keixa maibé iha tinan 2021, mosu fali problema, arguidu ho nia feen atual ba keixa testemuña ne'e mak testemuña mós ba hato'o keixa kontra arguidu kona-ba krime arma brankas ne'ebé akontese iha 06 Setembru 2017. Lezadu perdua arguidu nu'udar nia alin rasik.

Alegasaun finál

Prokuradór haktuir katak arguidu konfesa uza katana no arguidu uza katana la tuir nia funsaun. Tanba ne'e husu ba tribunál aplika pena prizaun tinan tolu suspende ba tinan tolu.

Defeza haktuir katak arguidu konfesa faktu ne'ebé akuza ba nia, arrepende ona nia hahalok, nune'e husu ba tribunál atu fó justisa ne'ebé justu ba arguidu.

Desizaun

Depoisde avalia faktu hotu, tribunál prova katak arguidu uza katana hodi komete krime. Bazeia ba faktu provadu sira ne'e no tetu mós sirkunstánsia atenuante sira hanesan, diak malu ona ho lezada, arrepende ona nia hahalok, nune'e tribunál konklui prosesu ne'e kondena arguidu ho pena prizaun tinan tolu suspende ba tinan tolu

7. Krime ofensa ba integridade física grave

Nú. Proses : 0028/21. BCSIC

Kompozisaun Tribunál : Koletivu

Juis : Dra. Maria Modesta d. A. Viera, Dra Jose Quintão no Dra. Sribuana da Costa

Prokuradór : Dr. Bartolomeu de Araújo

Defeza : Dr. Sidonio Maria Sarmiento

Desizaun

: Pena prizaun tinan 2 suspende ba tinan 2

Iha 10 Outubru 2022, Tribunál Distritál Baukau prezide julgamentu leitura akordaun ba krime ofensa ba integridade fízika grave ne'ebé envolve arguidu Juvito Bernadino Ximenes hasoru lezadu, iha Suku Tirilolo, Postu Administrativu Baukau Vila, Munisípiu Baukau

Akuzasaun Prokuradór

Prokuradór akuza katak iha 17 Juñu 2021, iha oras tuku 08:20 dadeer, lezada ho kondisaun moras mental tuur nonook hela, derepente arguidu ho kareta bemo mai to'o iha lezada nia oin arguidu tuun husi kareta kaer ho ai-pedasuk ida hodi baku dala ida iha lezadu nia ulun no baku dala ida iha lezadu nia kelen rezulta lezadu nia kelen tohar.

Prokuradór akuza arguidu kontra artigu 146 (b) KP kona-ba ofensa ba integridade fízika grave ho nia moldura penál tinan 2 to'o tinan 6.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no arguidu deklarata katak arguidu baku lezadu tanba arguidu nia alin feto informa ba arguidu katak bulak baku arguidu nia oan, nune'e arguidu nervozu ba iha lixu fatin hodi ai-pedasuk ida baku lezadu hanesan iha akuzasaun, arrepende ona ninia hahalok, foin primeiravés mai hatan iha tribunál.

Lezadu la marka prezensa iha julgamentu ne'e, tanba lezadu ho kondisaun moras mental

Alende ne'e, testemuña Maria Ximenes Simoes nu'udar vendedor ne'ebé faan sasan iha dalan depoimentu katak momentu faan hela dosi iha estrada ninin no haree lezadu tuur iha estrada ninin derepende arguidu ho kareta mosu mai kaer ho ai-baku dala ida iha lezadu nia ulun no baku dala ida iha lezadu nia kelen hafoin testemuña ba sori no dehan tanba sa baku fali ema bulak? hafoin arguidu sae nia kareta ba tiha.

Alegasaun finál

Prokuradór haktuir katak arguidu provadu komete krime hasoru lezadu no arguidu ninia agresan ne'e prenze rekezitu husi artigu 146 (b)KP ne'ebé akuza ba nia. Tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Defeza mós akresenta tan katak iha produsaun ba prova arguidu konfesa faktu ne'ebé imputa ba nia, arguidu nervozu tanba lezadu nu'udar moras mental, maibé baku arguidu nia oan tanba ne'e arguidu hirus halo fali agresan hasoru lezadu, arrepende ona ninia hahalok, foin primeiravés mai hatan iha tribunál, nune'e husu ba tribunál atu kondena arguidu ho pena prizaun tinan rua suspende ba tinan rua.

Desizaun

Depoizde avalia faktu sira hotu, tribunál halo alterasaun juridiku husi artigu 146 (b) KP ba fali artigu letra (e) KP, tanba tribunál prova katak lezadu nu'udar moras mental arguidu kaer ho ai-pedasuk baku iha lezadu nia ulun no baku iha lezadu nia kelen rezulta kelen tohar no bazeia ba relatóriu médiku lezadu ran sai barak loos.

Bazeia ba faktu provadu sira ne'e hotu no tetu mós sirkunstánsia atenuante sira hanesan arguida konfesa faktu sira, arrepende nia hahalok, foin primeiravés mai hatan iha tribunál. Tanba ne'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

8. Krime ofensa ba integridade física simples ho natureza violénsia doméstika

Nú. Prosesu : 0016/20. LALRO
Kompozisaun Tribunál : Singulár
Juis : Dra. Florencia Freitas
Prokuradór : Dr. Ambrosio Rangel Freitas
Defeza : Dr. Antonio Fernandes
Desizaun : Pena multa US\$45.00

Iha 13 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MdS hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 17 Outubru 2020, iha oras tuku 13:30 meiodia, lezada istori malu ho arguidu nia inan, nune'e arguidu buti lezada nia kakorok no basa dala ida iha lezada nia tilun-hun parte karuk no lezada konsege ba halo tratamentu iha ospital.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to' o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak arguidu ho lezada diskute malu kona-ba lezada istori mlau ho arguidu nia inan ho ida ne'e arguidu hirus halo agresau hasoru lezada hanesan faktu sira iha akuzasaun. Depoisde akontese di'ak malu kedas no kontinua moris hamutuk nu'udar feen ho la'en, arrepende ona nia hahalok, foin primeiravés mai hatan iha tribunál, arguidu serbisu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara katak depoisde akontesementu ne'e sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak iha audiénsia julgamentu arguidu konfesa faktu hotu iha akuzasaun no konfirma mós husi lezada, nune'e husu ba tribunál atu kondena arguidu ho pena multa.

Enkuantu defeza haktuir katak bazeia ba produsaun prova sira iha audénsia julgamentu henesan, arguidu konfesa, di'ak malu ona, depoisde akontesementu la baku ona lezada ho razaun hirak ne'e husu ba tribunál aplika pena suspensaun ba arguidu.

Desizaun

Depoisde avalia faktu hotu, tribunál prova katak arguidu buti dala ida iha lezada nia kakorok no basa dala ida iha lezada nia tilun-hun parte karuk.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada lora durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

9. Krime ofensa ba integridade física simples ho natureza violéncia doméstika

Nú. Prosesu : 0020/21. MNMNT
Kompozisaun Tribunál : Singulár
Juis : Dra. Florencia Freitas
Prokuradór : Dr. Ambrosio rangel Freitas
Defeza : Dr. Antonio Fernandes
Desizaun : Absolve

Iha 13 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguida BdC hasoru nia bin, iha Munisípiu Manatuto.

Akuzasaun Prokuradór

Prokuradór akuza katak, arguida nu'udar lezada nia alin hela hamutuk ho lezada no dependensia ekonomia ba arguida. Iha 04 Jullu 2021, lokraik, arguida toman lezada halo relasaun seksuál ho arguida nia la'en, nune'e arguida rakut lezada no tolok lezada.

Prokuradór akuza arguida kontra artigu 145 KP kona-ba ofensa ba integridade física simples ho nia moldura penál to' o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu, arguida deklara katak toman lezada halo relasaun seksuál ho arguida nia la'en, nune'e arguida mós moe foti lipa taka ba lezada nia isin no tolok lezada maibé arguida la rakut lezada no kontinua moris hamutuk nu'udar bin ho alin, foin primeiravés mai hatan iha tribunál.

Entretantu lezada deklara katak arguida toman lezada halo relasaun seksuál ho arguida nia la'en, família sira mak ba hato'o keisa ne'e mak lezada tauk no moe dehan arguida rakut lezada maibé loos mak arguida tolok de'it lezada.

Alegasaun finál

Prokuradór haktuir katak iha audiénsia julgamentu arguida deklara la halo agresaun hasoru lezada entretantu lezada konfirma arguida nia deklarasaun perante tribunál signífika katak krime ne'e la akontese, nune'e husu ba tribunál atu absolve arguida husi prosesu ne'e.

Enkuantu defeza haktuir katak bazeia ba produsaun prova, ne'ebé produs iha audénsia julgamentu, husu ba tribunál atu absolve arguidu husi prosesu ne'e.

Desizaun

Depoisde avalia faktu hotu, tribunál konsidera faktu hotu la provadu, nune'e tribunál konklui prosesu ne'e no absolve arguidu husi prosesu ne'e.

10. Krime omisídiu negligente

Nú. Prosesu : 0090/20. BCSTR
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Julio da Silva (advogado -Advokasia UNDIL)
Desizaun : Pena prizaun fulan 6 suspende ba tinan 1 fulan 6

Iha 14 Outubru 2022, Tribunál Distritál Baukau prezide julgamentu leitura sentensa ba krime omisídiu negligente ne' ebé envolve arguidu Manuel Ximenes da Silva hasoru lezadu Olimpio da Silva Gomes, iha Aldeia Lutumutu, Suku Tirilolo, Munisípiu Baukau.

Akuzasaun Prokuradór

Prokuradór akuza katak iha 26 Outubru 2020, iha oras tuku 15:00 lokraik, arguidu kondus kareta baskolante ho xapa matrikula 51-108 TIs, tula simente 50 sakas, ajulezu kaixa 60, kulsaun (*sprimbet*) medida 120x200 hamutuk 2, biskleta 2 no ema nain 5. Bainhira to'o iha área refere vítima kondus motorizada halai uluk arguidu husi kotuk sama travaun la funsi ona no espelu kareta nian parte loos tohar, roda sai nune'e soke vítima, vítima nia motorizada baku fila ba parte loos, rezulta vítima mate iha fatin akontesimentu, la to'o iha ne'e de'it arguidu mós soke tan comunidade nia kioske.

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 4 ka multa.

Produsaun ba prova sira

Iha prosesu julgamentu, arguidu deklara katak antes sai husi Dili, arguidu kontrola ona kareta refere tanba ne'e arguidu tula ho sasan inklui ninia bei-oan hamutuk nain haat no ajudante ida, derepente to'o iha rotunda dalan halai tun tama kuak esu parte loos nian tohar no sama travaun mós la funsiona, nune'e arguidu soke vítima haree ba oin kareta bemo ida ho ema barak nune'e arguidu silu ba kioske hodi soke tan kioske, maibé kioske laran ema laiha so iha deit ai-sunu mak iha laran. Depoisde akontesimentu ne'e arguidu halai ba polisia no arguidu ho família konkorda ho akordu katak arguidu indemniza ona vítima ho osan US\$11,000.00 sei falta US\$6,000.00 no osan restu ne'e arguidu sei selu

hotu iha fulan ikus tinan 2023. Arguidu nu'udar veteranu ho vensimentu kada fulan US\$275.00, arguidu kondus kareta dezde tinan 1972, inklui mekaniku ba kareta.

Alegasaun finál

Prokuradór haktuir katak arguidu konfesa integralmente ba faktu hotu, mezmu antes viajen arguidu kontrola kareta maibé arguidu tula sasan mak barak loos no viajen dook, arguidu ho vontade rasik indemniza ona vítima no sei kontinua fó hotu nia restu to'o fulan ikus tinan 2023 nian. Tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak depoisde produsaun ba prova arguidu konfesa faktu hotu sein rezerva, arguidu indemniza ona vítima tuir deklarasaun arguidu nian ne'ebé konfirma mós ho dokumentu iha autus, di'ak malu ona ho família vítima, arrepende ona ninia hahalok foin primeiravés mai hatan iha tribunál. Tanba ne'e husu ba tribunál atu aplika pena kmaan ba arguidu.

Desizaun

Depoisde avalia faktu hotu, tribunál konsidera faktu hotu provad, bazeia ba konfisaun arguidu nian.

arguidu indemniza ona vítima ho osan US\$11000.00 sei falta US\$ 6000.00 katak restu ne'e arguidu sei selu hotu iha fulan ikus tinan 2023. Arguidu nu'udar veteranu ho vensimentu US\$275.00, arguidu kondus kareta dezde tinan 1972, inklui mekaniku ba kareta.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan, diak malu ona ho vítima nia família, bazeia ba akordu ne'ebé iha arguidu sei fó indemnizasaun ba vítima ho osan US\$11, 000.00, arguidu fó ona US\$5,000.00 sei falta US\$6000.00 restu ne'e arguidu sei selu hotu iha fulan ikus tinan 2023. Nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida fulan neen.

11. Krime furtu agravadu

Nú. Prosesu	: 0031/17. BCSIC
Kompozisaun Tribunál	: Singulár
Juis	: Dra. Florencia Freitas, Dra. Jumiaty Maria Freitas no Dr. José António d. Escurial
Prokuradór	: Dr. Ambrosio Rangel Freitas
Defeza	: Dr. Grigório Maria Lourdes de Lima
Desizaun	: Pena prizaun fulan 3 suspende ba tinan 1

Iha 14 Outubru 2022, Tribunál Distrital Baukau prezide julgamentu leitura akordaun ba krime furtu agravadu ne'ebé envolve arguidu Agostinho da Costa hasoru lezadu Anacleto Freitas, iha Restaurante Tiga Mawar, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 13 Juñu 2017, iha oras tuku 14:00 lokraik, lezadu ho nia maluk nain rua ba han iha Restaurante Tiga Mawar, depoisde han hotu tiha lezadu ba kasir hodi selu hahan ne'ebé sira han, lezadu sae kareta no aranka kedas mai Dili no lezadu haluha hela nia pasta iha meja fatin lezadu han ba ne'e, arguidu nu'udar serbidor iha restaurant refere, bainhira lezadu aranka ona mai Dili, arguidu halot bikan sira iha meja no hadia kadeira haree hetan lezadu nia pasta rai hela iha kadeira leten, arguidufoti tiha lezadu nia pasta hodi ba tau iha fatin kasir nian, iha pasta laran lezadu nia osan US\$3,000.00, iha mós pasaporte no karimbu. Depoisde ne'e arguidu subar tutan tan lezadu nia pasta iha duut laran. Bainhira lezadu mai buka tuir nia pasta no husu arguidu maibé arguidu nega no kontinua diskute malu ho lezadu, nune'e lezadu kontaktu polísia no polísia to'o halo pasa revista ba aredor restaurante laran maibé la hetan lezadu nia pasta, nune'e polísia lori sira ba hotu eskuadra polísia Baukau Vila maibé arguidu nega nafatin.

Tuir mai iha 14 Juñu 2017, iha oras tuku 09:00 dader, Sr. Januario hein hela restaurante no atu ba presta deklarasaun iha eskuadra polísia, derepente arguidu ho tauk lori ho lezadu nia pasta no dehan ba Sr. Januario katak "*ohin hau loke portaun ema ida mai ho motor supra X apita entrega hela pasta ne'e hateten sasan titipan no nia simu tiha pasta ne'e*". rona tiha nune'e Sr. Januario fiar hodi kontaktu kedas polísia tuir mai sira lori pasta ba entrega iha polísia hodi halo pasa revista ba lezadu nia pasta no hetan hikas fali lezadu nia osan US\$2,000.00 ho kondisaun bokon. Enkuantu osan ho montante US\$1,000.00 arguidu foti, maibé depois arguidu sente ladiak arguidu fó fila fila osan US\$1,000.00 ne'e ba lezadu, nune'e lezadau nia osan hamutuk US\$3,000.00 arguidu fó fila hotu kedas.

Prokuradór akuza arguidu kontra artigu 252 KP kona-ba furtu agravadu ho moldura penál tinan 2 too tinan 8 prizaun.

Produsaun ba prova sira

Iha prosesu julgamentu arguidu konfesa faktu hotu iha akuzasaun arguidu mós deklarata katak, bainhira to'o iha eskuadra polísia arguidu entrega hotu osan no sira mós di'ak malu kedas. Arguidu deklarata liután katak arrepende ona nia hahalok no foin primeiravés mai hatan iha tribunál no arguidu nia vensimentu kada fulan US\$80.00 hodi sustenta deit ba família.

Alende ne'e lezadu konfirma faktu hotu iha akuzasaun no deklarata katak osan ne'ebé lezadu foti fó fila ona no sira di'ak malu ona iha Polísia Eskuadra Baukau Vila.

Alegasaun finál

Prokuradór haktuir katak arguidu konfesa integralmente no lezadu mós konfirma akuzasaun, nune'e akuzasaun Ministeriu Públiku prosedente provadu, mezmú nune'e lezadu mós fó fila hotu ona arguidu nia osan US\$3,000.00. Nune'e husu ba tribunál halo

atenuante extraordinariu no husu ba tribunál atu kondena arguidu ho pena prizaun fulan neen suspende ba tinan ida, atu arguidu la repete hikas nia hahalok ne'e iha futuru.

Enkuantu defeza husu ba tribunál atu aplika pena ne'ebé adekuadu ba arguidu, ho konsiderasaun katak arguidu konfesa, arrepende ona nia hahalok, di'ak malu ona ho lezadu no arguidu mós devolve fali ona lezadu nia osan ne'ebé arguidu foti.

Desizaun

Depoisde avalia faktu hotu, tribunál prova katak faktu hotu provadu, mezmu nune'e arguidu fó fila hotu ona lezadu nia osan.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu fó fila ona lezadu nia osan, di'ak malu ona ho lezadu, arrepende ona nia hahalok nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

12. Krime ofensa ba integridade física simples ho natureza violéncia doméstika

Nú. Prosesu : 0006/21. VQSIC
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena multa US\$40.00

Iha 17 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu EV (aman) hasoru nia oan fetu, iha Munisípiu Vikeke.

Akuzasaun Prokuradór

Prokuradór akuza katak iha 13 Marsu 2021, lezada ba toba iha nia avo nia uma, bainhira lezada fila arguidu ku'u lezada nia kelen, rezulta lezada sofre moras no bubu.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to' o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu, arguidu deklara katak ho nia feen moris separa ona, hela besik malu bairo ida no momentu ne'e lezada ba toba nia avo husi nia eis feen nia uma, la informa ba arguidu no kalan arguidu buka la hetan dadeer mosu fali ne'e mak arguidu hirus ku'u lezada nia kelen. di'ak malu ho lezada nu'udar nia oan, foin primeiravés mai hatan iha tribunál, arrepende ona nia hahalok, depoisde akontese la baku ona lezada no arguidu nu'udar motorista ho vensimentu kada fulan US\$250.00.

Alende ne'e, lezada continua konfirma faktu hotu iha akuzasaun no deklara katak lezada ba toba iha avo nia uma la informa ba arguidu. Depoisde akontese sira di'ak malu ona no arguidu la halo ona agresaun ruma hasoru lezada to'o agora.

Alegasaun final

Prokurador haktuir katak, haree ba produsaun ba prova arguidu nia konduta ne'e priense elementu husi krime ofensa ba integridade fizika simples, mezmu sira di'ak malu ona maibe nafatin tau atensaun atu iha futuro arguidu la repete tan ninia hahalok ne'e, nune'e husu ba tribunál atu kondena arguidu ho pena multa.

Entretantu, defeza haktuir katak bazeia ba produsaun prova, arguidu konfesa integralmente ba faktu hotu iha akuzasaun, arrepende ona ninia hahalok, diak malu ona ho lezada no foin primeiraves mai hatan iha tribunál. Tanba ne'e husu ba tribunál aplika pena multa ba arguidu.

Desizaun

Depoisde avalia faktu hotu, tribunál prova katak arguidu ku'u lezada nia kelen nune'e lezada sente moras no bubu.

Bazeia ba faktu provadu sira ne'e hotu no tetu mos ho sirkunstansia atenuante sira hanesan arguidu konfesa, arrepende ona nia hahalok, foin primeiraves mai hatan iha tribunál. Ho nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0,50 sentavus kada lora durante lora 80. Tribunál mos fiksa pena alternativa durante lora 53 prizaun, bainhira arguidu la kumpri pena multa refere.

13. Krime abuzu seksuál ba menor

Nú. Prosesu : 0027/19 VQWTL
Kompozisaun Tribunál : Koletivu
Juis : Dra. Florensia Freitas, Dra. Jumiaty Maria Freitas no Dr. Jose António d. Escorial
Prokurador : Dr. Ambrosio Rangel Freitas
Defeza : Dr. Sidonio Maria sarmento
Desizaun : Pena prizaun tinan 12.

Iha 18 Outubru 2022, Tribunál Distritál Baukau prezide julgamentu leitura akordaun ba krime abuzu seksuál ba menor ne'ebé envolve arguidu PM hasoru lezada ho idade tinan ualu, iha Munisípiu Vikeke.

Akuzasaun Prokurador

Prokurador akuza katak iha 11 Novembru 2020, iha oras ne'ebé la apura lezada hamutuk ho nia inan ba iha nia avo nia uma.

Tuir mai iha 12 Novembru 2020, dadeer, lezada nia inan konverse ho lezada nia avo iha varanda no haree labarik sira seluk halimar iha varanda, maibe lezada la iha. Ho nune'e lezada nia inan tama ba uma laran no tama liu ba arguidu nia kuartu, haree arguidu ho

lezada toba hamutuk iha kama laran no taka hela manta hafoin lezada nia inan rasta sai manta, haree lezada nia rounpa laran iha hela nia ain-tuur no arguidu hahú toba fila kotuk ba lezada no arguidu foin dada nia rounpa, lezada nia inan rasta sai lezada no haree lezada nia orgaun seksuál no asentu mesak esperma de'it, nune'e lezada nia inan hakilar hodi bolu nia avo hodi haree, hafoin lezada nia inan hateten ba arguidu katak nusa mak *"ó estraga fali ó nia feton"*.

Prokuradór akuza arguidu kontra artigu 177 KP kona-ba abuzu seksuál ba menór ho moldura penal tinan 5 to'o tinan 20 no artigu 182 (1) KP kona-ba agravasaun.

Produsaun ba prova sira

Iha prosesu julgamentu, arguidu hili direitu nonook. Enkuantu lezada konfirma faktu hotu iha akuzasaun.

Testemuña VdA nu'udar lezada nia inan, depoimentu katak lezada ho nia alin halimar iha uma laran depois nia alin sai mai liur testemuña haree lezada la iha ne'e mak testemuña ba loke arguidu nia kurtina haree ba arguidu taka lezada ho kafoti nune'e testemuña rasta kafoti haree ba lezada toba hela kafoti okos no lezada nia rounpa laran iha hela ain-tuur no lezada nia isin esperma de'it, nune'e testemuña informa ba testemuña LA nu'udar lezada nia avo feto.

Testemuña LA nu'udar lezada nia avo feto depoimenta katak testemuña VdA mak bolu nune'e testemuña ba haree lezada nia isin bokon ho esperma.

Alegasaun finál

Prokuradór haktuir katak iha produsaun ba prova arguidu hili direitu nonook, maibé lezada konfirma faktu hotu iha akuzasau, nune'e prokuradór konklui katak arguidu provadu komete krime abuzu seksuál ba menór ho agravasaun, tanba ne'e husu ba tribunál atu kondena arguidu ho pena prizaun tinan sanulu resin lima.

Entretantu, defeza haktuir katak arguidu hili direitu nonook, maibé bazeia ba produsaun ba prova, husu ba tribunál atu fo justisa ne'ebé justu no adekua ba arguidu.

Desizaun

Depoisde avalia faktu hotu, tribunál prova katak iha 11 Novembru 2020, iha oras ne'ebé la apura lezada hamutuk ho nia inan ba iha nia avo nia uma.

Tuir mai iha 12 Novembru 2020, dadeer, lezada nia inan konverse ho lezada nia avo iha varanda no haree labarik sira seluk halimar iha varanda, maibé lezada la iha. Ho nune'e lezada nia inan tama ba uma laran no tama liu ba arguidu nia kuartu, haree arguidu ho lezada toba hamutuk iha kama laran no taka hela manta hafoin lezada nia inan rasta sai manta, haree lezada nia rounpa laran iha hela nia ain-tuur no arguidu hahú toba fila kotuk ba lezada no arguidu foin dada nia rounpa, lezada nia inan rasta sai lezada no haree lezada nia orgaun seksuál no asentu mesak esperma de'it, nune'e lezada nia inan hakilar hodi bolu nia avo hodi haree, hafoin lezada nia inan hateten ba arguidu katak nusa mak *"ó estraga fali ó nia feton"*.

Bazeia ba faktu provadu sira ne'e hotu tribunál konklui prosesu ne'e no kondena arguidu ho pena prizaun tinan sanulu resin rua.

14. Krime ofensa ba integridade fízika simples ho natureza violénsia doméstika

Nú. Prosesu : 0045/21. LALPL
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Grigório Maria Lourdes de Lima
Desizaun : Pena prizaun tinan 1 suspende ba tinan 1

Iha 21 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ELP hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 14 Novembru 2021, iha oras tuku 10:00 kalan, arguidu dun lezada buan no dehan ba lezada katak lezada mak halo arguidu nia apa mate, nune'e arguidu ho lezada diskute malu arguidu buti lezada nia kakorok, dulas lezada nia liman rua no kaer lezada riba ba parede.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak serbisu nu'udar siguransa fila tuku 10:00 kalan, lezada la te'in no lezada foti tan tiha arguidu nia telemovel no lakleur arguidu haree lezada mesak riba-an ba parede, arguidu la halo agresauun ruma hasoru lezada, depoisde akontese lezada ba nia uma la fila to'o agora, sira forma família iha tinan 2006, iha oan nain haat.

Alende ne'e, lezadu konfirma faktu hotu iha akuzasaun, depoisde akontese lezada ba hato'o keixa, diside moris separa ho arguidu, nune'e arguidu mós hola fali ona fetu seluk, oan nain rua hela ho lezada no oan nain rua hela ho arguidu, agora dadauk lezada serbisu iha loja hodi sustenta nia oan sira.

Alegasaun finál

Prokuradór haktuir katak mezmú arguidu nega faktu hotu iha akuzasaun, maibé lezada nafatin konfirma akuzasaun, depoisde akontese sira moris separa ona to'o agora. Mezmú sira moris separa ona maibé nafatin atu halo prevensaun atu arguidu la repete ninia hahalok ne'e iha futuru. Nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu ba tribunál atu fó pena ne'ebé justu no adekuadu ba arguidu ho konsiderasaun ba faktu sira ne'ebé produs iha audénsia julgamentu.

Desizaun

Depoisde avalia faktu hotu, tribunál prova katak arguidu buti lezada nia kakorok no dulas lezada nia liman rua kaer lezada riba ba parede.

Bazeia ba faktu provadu sira ne'e hotu, tribunál konklui prosesu ne'e no kondena arguidu ho pena prizaun tinan ida suspende ba tinan ida.

15. Krime ofensa ba integridade física simples ho natureza violência doméstica

Nú. Prosesu : 0019/20. VQSIC
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Julio da Silva Correia
Defeza : Dr. Sidonio Maria Sarmento
Desizaun : Pena multa US\$50.00

Iha 24 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha data, fulan no tinan ne'ebé la apura, maibé iha oras tuku 22:00 kalan, arguidu ho lezada diskute malu kona-ba lezada la fó fila arguidu nia telemovel, nune'e arguidu basa dala ida iha lezada nia hasan parte karuk no tuku dala ida iha lezada nia ulun parte karuk no lezada consege ba halo tratamentu iha Sentru Saúde Vikeke.

Prokuradór akuza arguidu kontra artigo 145 KP kona-ba ofensa ba integridade física simples ho nia moldura penál to' o tinan 3 ka multa konjuga ho artigo 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'e loos hotu no deklara tan katak arguidu ho lezada iha relasaun namoru iha tinan 2018, lezada sei eskola maibé arguidu mós sustenta lezada nu'udar nia feen, mezmú lezada hela ho nia inan aman arguidu sempre fó osan hodi sosa ninia nesesidade mak hanesan kaderno no ajuda mós ho hahan, foin primeiravés mai hatan iha tribunál, arrepende ona nia hahalok, depoisde akontese la baku ona lezada no arguidu ajuda ema badaen halo rehabilitasaun eskola hetan vensimentu fulan ida US\$217.00

Alende ne'e, lezada deklara katak sira namoru iha tinan 2018 no kontinua moris hamutuk hanesan feen, la'en, maibé família sira mak la aseita nune'e sira ida-idak hela iha sira nia uma, mezmú nune'e arguidu mak sustenta lezada nia nesesidade nomós lezada nia

inan aman. iha tinan 2019, arguidu halo agresaun hasoru lezada basa dala ida iha lezada nia hasan no tuku dala ida iha lezada nia kotuk laran. Faktu ne'ebé akontese iha 28 Outubru 2020, tuku 22:00 kalan, lezada konfirma akuzasaun, kazu ne'e ema seluk mak hato'o keixa la'os lezada.

Alegasaun finál

Prokuradór haktuir katak arguidu ho lezada iha ona relasaun intimu iha tinan 2018, tanba serbisu arguidu hela iha Dili lezada hela iha Uatucarbau durante ne'e arguidu mak sustenta bazeia ba lezada nia deklarasaun. Tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Enkuantu defeza haktuir katak, arguidu kopera diak ho tribunál, arguidu ho lezada hela ketak-ketak lezada nia inan aman mak sustenta sira la iha relasaun feen laen no kazu ne'e akontese ema seluk mak ba keixa, tanba ne'e husu ba tribunál halo alterasaun ba krime ofensa ba integridade simples deit, tanba la priense ba krime ho natureza violénsia doméstika. Krime ofensa integridade fizika simples no ema seluk mak ba hato'o keixa ne'e la'os lezada, tanba ne'e husu ba tribunál atu absolve arguidu husi prosesu ne'e.

Desizaun

Depoisde avalia faktu hotu, tribunál prova katak arguidu iha tinan 2019, arguidu basa dala ida iha lezada nia hasan no tuku dala ida iha lezada nia kotuk laran. Iha 28 Outubru 2020, tuku 10:00 kalan arguidu nervozu basa dala ida iha lezada nia hasan parte karuk no tuku dala ida iha lezada nia ulun parte karuk.

Bazeia ba faktu provadu ne'e no tetu mós ho sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$50.00 ne'ebé kada laron arguidu sei selu 0,50 centavus durante laron 100. Tribunál mós fiksa pena alternativa durante laron 66 prizaun, bainhira arguidu la kumpri pena multa refere.

16. Krime ofensa ba integridade física simples ho natureza violénsia doméstika

Nú. Prosesu	: 0069/21. VQVQQ
Kompozisaun Tribunál	: Singulár
Juis	: Dr. Florencia Freitas
Prokuradór	: Dr. Bartolomeu de Araújo
Defeza	: Dr. Grigório Maria Lourdes de Lima
Desizaun	: Pena multa US\$45.00

Iha 27 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JP hasoru nia feen, iha Munisípiu Vikeke.

Akuzasaun prokuradór

Prokuradór akuza katak iha 19 Dezembru 2021, iha oras tuku 18:00 lokraik, lezada koaliala netik arguidu la bele ba Dili lai tanba lezada grávida hela, ho nune'e arguidu ho lezada

diskute malu arguidu tebe dala ida iha lezada nia kabun mamar rezulta lezada monu tun ba rai to'o desmaia. Lakleur lezada hadeer fali tama ba sira kuartu laran foti mina hodi kose ba nia kabun, arguidu tama tuir ba kuartu laran kontinua diskute malu ho lezada no arguidu dudu lezada rezulta lezada monu tun no lezada nia kabun kona iha didin lolon.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu hili direitu nonook. Enkuantu lezada konfirma faktu hotu iha akuzasaun, lezada ho arguidu diak malu ona no to'o agora moris hamutuk nafatin hanesan feen ho laen.

Alegasaun finál

Prokuradór konsidera arguidu nia hahalok ne'e provadu tuir faktu sira hotu iha akuzasaun tanba iha produsaun ba prova lezada konfirma faktu hotu, mezmu arguidu hili direitu nonook, prokuradór intende katak arguidu provadu komete krime ne'ebé imputa ba nia, razaun hirak ne'e husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak bazeia ba produsaun prova konkorda prokuradór nia alegasaun.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kabun mamar rezulta lezada monu tun ba rai to'o desmaia. Lakleur lezada hadeer fali tama ba sira kuartu laran foti mina hodi kose ba nia kabun, arguidu tama tuir hafoin diskute malu arguidu dudu lezada monu tun no lezada nia kabun kona iha didin lolon.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu ho lezada diak malu ona no moris hamutuk nafatin hanesan feen ho laen, nune'e tribunál konklui prosesu ne'e no kondena arguida ho pena multa US\$45 ne'ebé kada lora arguidu sei selu 0,50 sentavus durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

17. Krime ofensa ba integridade fízika simples ho natureza violénsia doméstika

Nú. Prosesu	: 0101/22. BCBCV
Kompozisaun Tribunál	: Singulár
Juis	: Dr. Florencia Freitas
Prokuradór	: Dr. Bartolomeu de Araújo
Defeza	: Dr. Grigório Maria Lourdes de Lima
Desizaun	: Pena multaUS\$45.00

Iha 28 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdCB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 27 Juñu 2022, iha oras tuku 11:00 meiodia, arguidu kaer lezada nia kakorok hodi tuku dala ida iha lezada nia kanuruk, tuku dala barak iha lezada nia kabaas no dehan ba lezada "*ó tama ba uma laran ka lae?*" no kontinua tuku dala ida iha lezada niaibun rezulta lezada niaibun bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, depoisde akontese sira diak malu ona, arrepende ona ninia hahalok, foin primeiravés mai hatan iha tribunál no promete sei la komete tan krime seluk iha futuro. Arguidu nu'udar agrikultór rezultadu hodi sustenta de'it ba família.

Alende ne'e, lezada konfirma faktu hotu iha akuzasaun no deklara katak arguidu nu'udar lezada nia laen segundu, tanba lezada antes ne'e hola ona mane. Bainhira iha fulan Marsu lezada atu tuir votasaun mak arguidu impede netik lezada, nune'e lezada la fila no sira nain rua moris hamutuk nu'udar feen la'en, lezada nafatin kontaktu nia laen primeiru. Lezada diside moris separa ona ho aguidu.

Alegasaun finál

Prokuradór haktuir katak Iha julgamentu arguidu konfesa faktu hotu ne'ebé konstitui ba krime ne'e no lezada mós konfirma faktu hotu iha akuzasaun, arguidu konsidera lezada nu'udar nia feen tuir loloos arguidu mak proteze lezada la'os halo fali agresaun hasoru lezada no tuir lezada katak to'o agora sira moris separa ona. Tanba ne'e husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza akresenta katak mezmú arguidu konfesa parsial maibé arguidu hatudu nia arrependementu, tanba ne'e husu ba tribunál aplika pena ne'ebé adekuaduba arguidu.

Desizaun

Depoisde avalia faktu hotu, tribunál prova katak arguida kaer lezada nia kakorok tuku dala ida iha lezada nia kanuruk, tuku dala barak iha lezada nia kabaas no kontinua tuku dala ida iha lezada niaibun rezulta bubu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e kondena arguidu ho pena multa US\$45.00 ne'ebé arguidu sei selu kada loraun 0,50 sentavus durante loraun 60. Tribunál

mós fiksa pena alternativa durante loron 40 prizaun, bainhira arguidu la kumpri pena multa refere.

18. Krime ofensa ba integridade fízika simples ho natureza violénsia doméstika no danu simples

Nú. Prosesu : 0045/22. PDBAU
Kompozisaun Tribunál : Singulár
Juís : Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena prizaun tinan 1 suspende ba tinan 1

Iha 28 Outubru 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika no konsiliaisaun ba krime danu simples ne'ebé envolve arguidu Jaime da costa hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha 17 Feveireiru 2021, iha oras tuku 21:00 kalan, arguidu uza ai baku dala barak iha lezada nia kotuk laran, tuku dala barak iha lezada nia ulun no rega ai-manas ba iha lezada nia matan laran.

Tuir mai iha 21 Marsu 2021, arguidu estraga lezada nia telemovel ho folin US\$179.00 tanba lezada haree arguidu haruka ninia foto ba ninia amante (*selingkuh*).

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD no artigu 258 KP kona ba danu simples ho nia moldura penál to'o tinan 3 ka multa.

Tentativa konsiliaisaun

Antes tama ba produsaun ba prova, bazeia ba artigu 262 KPP kona-ba tentativa konsiliaisaun, tribunál halo tentativa konsiliaisaun ba arguidu ho lezada relasiona ho krime danu simples hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaisaun ne'e, lezada hakarak deziste nia keixa tanba perante tribunál arguidu selu lezada nia telemovel nia folin ho osan US\$179.00. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime ofensa ba integridade fízika simples ho natureza violénsia doméstika, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara katak akontese iha 17 Feveireiru 2021, iha oras tuku 21:00 kalan, lezada tau ai-manas ba modo manas liu, nune'e arguidu uza ai baku iha lezada nia kotuk no tuku dala ida iha lezada nia ulun, arguidu la fakar ai-manas ba

lezada nia matan, maibé arguidu baku modo been iha bikan ne'e mak modo been kona lezada nia matan.

Tuir mai iha 21 Marsu 2021, momentu ne'e ema barak loos iha iha mate uma, lezada kontaktu ba nia bin katak imi mai ona, tanba arguidu nia amante iha mate uma, ho nune'e arguidu foti lezada nia telemovel hodi estraga tiha. Arguidu deklar tan katak seidak diak malu, arrepende ona nia hahalok, foin primeiravés mai hatan iha tribunál arguidu nu'udar agrikultór rezultadu hodi sustenta de'it ba família

Entretantu lezada konfirma faktu hotu iha akuzasaun, seidak diak malu ho arguidu no depoisde problema ne'e decide moris separa husi arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba deklarasaun arguidu nian no konfirmasaun lezada nian, arguidu nia konduta ne'e lezada diside moris separa ona husi arguidu. Tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak bazeia ba produsaun ba prova, arguidu konfesa faktu ne'ebé nia komete, arrepende ona ninia hahalok no foin primeiravés mai hatan iha tribunal. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu uza ai-baku dala barak iha lezada nia kotuk laran, tuku dala barak iha lezada nia ulun no rega ai-manas ba iha lezada nia matan laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ona ninia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl